

小

腆

紀

傳

小腆紀傳卷第五十九

前翰林院檢討加詹事府贊善銜六合徐鼎謨

列傳第五十二

方外

晞容

海明

邳州石屋僧

項

缸

景嘔
一泓

丹竹

德宗

南獄和上

道源

函可
明光

成如

回禿
壽髡

殘傳
知休

良

大成

桑山人

陳仙者

松仙

清疑上人

狗皮道人

銅袍道人等

晞容七寶寺僧也甲申獻賊攻豹子碕晞容曰碕中數百萬

生靈豈可坐視其死糾鄉勇五百人拒戰身先衝殺賊大敗
嗣中圍解於是簡練精悍與賊相持前後殺賊千計一日賊
突至遂爲所害又海明號破山四川人主嘉興東塔寺後入
蜀獻賊之黨李某嘗欲屠保甯城破山爲請命賊持犬豕肉
曰噉此者從汝破山曰老僧爲百萬生靈忍惜如來一戒乎
遂嘗數鬻因以免著有破山語錄

邳州石屋僧者當南都破時國子生王台輔大集親朋哭祭
崇禎帝而後就縊僧適過之手持一麻鞭指之曰此亦常事
也惡用是矜張爲後數月有渡河來者曰石屋寺一僧以雉
經死有鞭在其側僧名不可知以其死石屋名之曰石屋僧
項缸景喙皆蘇州僧也乙酉六月蘇州城中義師起項缸戰

甚力手殺我兵數十人未幾潰而西山徐雲龍復率眾薄胥門我騎兵衝突出雲龍走景岷戰死又有僧一泓不知何許人張名振之以海師應吳勝兆也兵敗於洪濤中浮蓬上得不死登岸遇一泓招至巷中爲剃髮易服飯罷令卽走名振貽以印屬以後騎甫脫而追兵至搜得大領濕衣並印一泓給以他路追不獲遂遇害

丹竹者江西安仁某寺僧羅川王起義師時三十六將之一也勇冠一軍嘗從揭重熙襲撫州猝遇我將王得仁丹竹以步逐馬刃及得仁面幾獲之後金聲桓過安仁聞其病遣九騎往縛之丹竹力疾起呼所部十餘人伏於隘而單身入酒肆中金騎見其僧不知其卽丹竹也因問識丹竹乎遠應曰

曰我是也拔刀殺二人七騎者上馬馳遇伏獲其二再前再
遇獲其三得歸者纔二騎耳聲桓破廣信丹竹以木椿置水
中舟盡碎多溺水死丹竹盡其所獲而返後率壯士邀擊
王師之入閩者馬蹶被殺

德宗揚州僧也談禍福奇中高傑折節稱弟子問曰弟子他
日得免於禍乎德宗曰居士起擾攘今歸朝爲大將爲通侯
此不足爲居士重惟率眾從史居士儒家稱聖人我法所謂
菩薩與之一志併力可謂得所歸矣傑歛容服金聲桓少時
亦嘗師事之德宗拊其背曰勉之二十年後江右福主世人
盡變紅頭蟲此其侯已後降

大淸爲江西提督軍中冠著紅纓以其言驗也益信禮之德

宗乃勸其改圖聲桓之復歸明德宗啓之也

南嶽和尚退翁者名洪儲字繼起揚州興化人姓李氏早歲出家師事三峰爲高弟駐錫蘇之靈巖父嘉兆志士也甲申之變貽書其子曰吾始祖咎繇爲理官子孫因氏理其後以音同亦氏李今先皇帝死社稷而賊乃李氏吾忍與賊同姓乎吾子孫尙復姓理氏先是中州李邕和上書請改理氏嘉兆未知而適與台天下傳爲二理洪儲雖出家然感其父之大節丙戌以後東南之士濡首焦原吳中爲最衝皆相結納從者如市然厚重不洩爲人排大難最多世不盡知也辛卯竟被連染諸義士爭救之久而得脫好事如故或以前事戒之則曰吾苟自反無愧卽有意外風波久當自定又曰道人

家得力正於不如意中求之使憂患得其宜湯火亦樂國也
吳中高士徐枋歎曰是真以忠孝作佛事者也枋所居澗上
草堂當靈巖之麓生平不肯納人絲粟之餽顧獨於洪儲有
深契自稱白衣弟子洪儲時其急而周之無不受嘗曰退翁
是西竺國中所謂大人者也故儀部周之璵三吳之良也臨
終脫然談笑逝洪儲蹙然沈吟曰是恐非故國遺臣所宜聞
者瞿然嘉禾吳鉏有大志一見輒歎曰軍持中有此老吾輩
甯不愧死一日登堂說法忽發問曰今日山河大地又是一
度否眾莫敢對居吳既久築報慈堂於堯峰祀其父晚以南
嶽之請主講福嚴寺吳人惟恐失之復迎歸壬子卒於靈巖
年六十有九著有靈巖樹泉集孝經箋說在沙門四十年閱

暢宗風篤好人物大類三峰海內皆能道之徐枋曰是非退
翁心之精微但觀其每年三月十九日素服焚香北面揮涕
二十八年如一日是何爲者

道源號石林太倉州人居蘇州北禪寺好讀儒書嘗類纂子
史百家爲小碎集又註李義山詩三卷其言曰世論少陵忠
君愛國每飯不忘而目義山爲浪子以其綺靡華豔極玉臺
金縷之體而已第少陵之志直其詞危義山當南北之水火
中外箝結不得不紆曲其指誕謾其詞此風人小雅之遺推
原其志義可以鼓吹少陵吳江朱長孺箋義山詩多取其說
云

函可字祖心博羅人尙書韓日繼子少爲諸生忽棄家入羅

浮山

王師下江南函可坐事戍瀋陽有剩人詩

成回字霜華不知何許人示寂於紹興之顯聖寺或曰崇禎癸未進士嘉善錢默不識也有雜感詩見朱彝尊明詩綜

明光姓王號上中事母孝後爲僧廈門之開元寺與阮文錫唱和文錫選其詩三百首名偶然草同寺僧如壽姓傅字濟翁亦能詩明光工草書如壽精楷法人稱明光草如壽真

髡殘字介邱號石溪武陵劉氏子母夢僧入室而生一夕大哭不已引刀自薙其頭血流被面同里教諭龍人儼儒而禪者也一見絕愛之令遊江南參學至白門遇一僧言已得雲棲大師爲薙度因請大師遺像拜爲師返楚居桃源某庵久

之忽有所悟心地豁然再往白門謁浪杖人一見皈依所交
遊皆前朝遺逸顧炎武其一也髡殘脫略一切獨嗔怒不可
解在祖堂與眾僧不合少受寒溼身臂作痛厭苦之疾革語
大眾死後焚骨灰投江流中眾有疑色復大叫曰不以吾骨
投江者死去與他開交不得眾從之歿後十餘年有瞽僧至
燕子磯募工升絕壁刻石谿禪師沈骨處又有傅良字去六
攸人以詩見知於祁陽王王奇其才欲以湯休賈島故事擢
之不可年八十五卒大成字竺菴醴陵人少披薤於南嶽後
行腳四方晚歸南嶽詩有奇氣拳拳故國君父之戚殆亦有
託而逃者也知休不知何處人居茶陵秦人洞不食煙火偶
爲樵者所見始有物色之者山多虎患知休馴狎之至今虎

不傷人

桑山人姓許氏名澄汴人也少爲諸生崇禎中嘗獻剿賊三策於督師楊嗣昌不用鬱鬱歸甲申後至淮上入劉澤清幕旣而語不合拂衣去有怨家發其隱事於我帥之鎮汴者走匿桑下因自號桑山人日與嵩陽曹道士遊夜坐忽耳鳴絲竹徐發若有物按其頂聳身丈餘骨節皆通自是竟得道嘗賣藥嵩山廟市以水酌暗者能言洗盲者能覩許州童子爲狐所苦邀過其家呼狐出狐遜追斬之空中啾啾有聲毛落盈把人遂以爲神已復還汴怨家見之曰此許某也率十數人掩捕之山人乃大笑獨身指揮盡縛諸捕者揖怨家者謝曰天壤甚寬人心自窄爾必吾殺吾必爾報怨之不解傷吾

道矣吾姑去遂身遊衡陽不復返

陳仙者本名王賓字天倪定海諸生少負異稟性高亢不肯一蒙挫於人甲申後大江以南頑民未化海氛錯出風波震驚遂遯跡中怏怏不自得忽一道士過之曰吾子誠高士然喪亂之辰負此剛腸恐爲意外之變所折也吾授子藥急則用初不以爲意度其藥閣中已果當厄念道士言姑試之神効乃稍稍習之後得道去

松仙在湖州山中瞿式耜初奉撫粵之命松仙授以錦囊數封曰臨危始發發則其事與年月日時皆預定也擒靖江守桂林用焦璉皆依策行之有效末一封題庚寅元旦發發之中有扶公榮歸四字是年竟死庶吉士錢秉鐙親見之

清凝上人宜興人瞿式耜張同敞之殉難也與式耜門下士楊藝御史姚端具衣冠葬之風洞山之麓廬墓不去

狗皮道人者黃冠朱履身被狗皮口作狗吠乞食成都城中狗從而和之市人與之錢粟道人則畫然作虎嘯狗皆避易俄而獻賊至突出馬前作狗聲賊怒逐之弗及射之矢及其腦激而還貫賊騎騎蹶賊駭以爲神比賊僭號元旦受朝賀忽狗皮者列班行狗吠不止賊怒且恨命縛之則益大吠俄廷陞問如數千狗聲賊大呼殺殺眾不聞蓋爲吠聲亂也賊驚退狗倏絕聲道人亦杳銅袍道人者張閑善也聯銅片周其身行則丁當有聲於狗皮後見於川川之人遂以銅袍名而或又呼爲張丁當嘗與滇中鐵道士飲市中旣醉則訝呼

烏烏大慟去鐵道士殘明諸生初不詳其姓氏永歷帝入緬
乃棄家學道首覆一折腳鎗爲冠人與之酒少卽張口下多
則脫鎗受且行且嚙歌且哭若婦人與之則睜目曰男女也
可授受乎麾之弗顧所至問向人乞鐵一片自肩臂胸背至
腰以下悉懸之小大如鱗故與銅袍遇輒擊掌狂笑又一女
子自稱鐵娘子腰纏鐵索纍如牛重不可知自西之東疾走
大呼曰鐵娘子失去鐵牛一頭報信者予錢十萬貫呼數日
賊以爲妖帥千騎射之矢若飛蝗卒無一中賊大怖歸而病
未幾

王師下卽中創死鐵娘子後從狗皮道人仙去活死人者本
蜀中素封子姓江氏名本實國亡後散家財棄妻孥入終南

山得煉形術因自號活死人焉弟子陳留王者得其旨能於
水面立峭壁行一日縛虎爲騎活死人怒責之曰所貴乎道
者靜無爲也有爲則駭世豈妙道哉陳留王乃面壁三年曰
道有傳人吾將蛻已趣掘土穴入之命封土毋許通隙旣埋
羣弟子朝夕拜呼之輒應三年後始寂乃立石表之曰活死
人之墓上官常明者南昌人嘗爲武弁居天津爲道士年六
十餘有道行丙戌閏中敗購一缸舁之庭遽入試之南而坐
曰正好不須擇日眩世去了罷卽瞑目逝其徒素無賴好飲
博謀出其屍以缸易酒夜啓之枵然大驚已遍體生瘡不
能動有客自吳門還遇道人淮陰市問何日離天津云三月
三客留之飯臨別授一方乞付其徒治瘡客歸詣之始知道

人先三年亡啓釭之夕正上巳也周德風字思永亦南昌人
留列仕版南都亡棄官入道自號古月遊廣陵搢紳間豫告
死期以坐化年七十有六後有自武當來者遇諸塗云同時
有心月道人譚守誠鄱縣人明亡黃冠棄家遍遊名山晚止
江甯城西虎踞山之隱仙菴旣而語弟子曰某日吾將歸乃
端坐說偈而逝宿州鬼道士姓章失其名以其能役鬼故以
鬼爲號鬼名柳青隨道士所至常住徐州大雪中麻衣躑躅
汗津津如六月狀徐之人挈榼登山道士乞飲或曰一壺酒
羣飲且不足安得餘漈道士拊掌拾石子如豆訶之成白金
付主人奴代沽盡醉數十客而壺不竭有御史者奇之與之
遊一日忽請貸金十笏御史有難色道士曰戲耳吾自有吾

金呼柳青來遙指榻上則黃白粲粲細審之皆御史囊中物
大疑道士復呼柳青去則物已空明日御史竟暴卒南都亡
道士沈於桃源之淵後數年徐之人徃山左過泰山酒樓聞
有歌大江東者覘之則依然一鬼道士朱衣道人不知何許
人自言爲明諸生國亡棄家入道能作九州外夷語冠玉冠
服朱服嘗自三吳走薊門七日往返寄人家書有驗嘗戲作
紙鳶數十丈坐二童子於鳶背給以金鼓乘風吹入雲霄聞
者疑是天樂或有知之者曰此朱衣者爲明室支孫

男承禮編輯

仁和魏錫曾參校
會稽梁繼元覆校

小腆紀傳卷第五十九終

小腆紀傳卷第六十

前翰林院檢討加詹事府贊善銜六合徐鼎謨

列傳第五十三

列女

徐夫人

縣州劉氏四烈婦新津袁氏等

健爲陳氏二女仁壽辜氏女敘州婦女納溪二王氏等

劉氏馬氏等馬氏

侯氏劉氏等張氏

劉氏江都程氏六烈

江都孫氏婦女張氏薛氏田氏

劉氏陶氏

于氏

黃道宏妻

王氏

方氏

顧炎武母王氏

香娘 草衣道人

隱隱

葛嫩

劉淑英

畢弢文

賈氏

沈氏

劉氏

徐氏

謝氏

商夫人 仲商夫人
祁德淵

沈雲英

項淑美 王氏

烈婦錢氏陳氏

二孟氏

潘氏

俞沈氏

余氏 倪氏

李陳氏 周氏

張氏 俞氏等

余氏

甬上四烈婦

烈女王氏

金四姐

方氏 周氏等

李氏

文鶯

鮑氏

史八夫人

番禺李氏許氏

夏氏

郭純貞

董夫人 子經妻唐夫人

陳夫人

鄭氏

黃棄娘

鄭宜娘

四葉氏

義娘 楊氏 陳氏

徐夫人甯海儒家女都御史左懋第之母也崇禎末懋第以給事中奉命犒左良玉軍夫人偕從子懋泰留京師甲申三月城陷懋泰奉以歸數日不食行至白溝河仰天歎曰此張叔夜絕吭處也呼懋泰前責其不死且曰吾婦人身受國恩不能草間求活寄語懋第勉之勿以我爲念言訖而死

絳州劉氏四烈婦關南道劉宇揚妻李氏侍郎劉宇烈妻張氏大學士劉宇亮妻宋氏甲申八月獻賊破絳州避西山白甍溝賊將劉文秀訪得之三氏相謂曰吾姑昔日涪水遇盜懼辱投水死吾輩受污何以見姑於泉下遂自縊死宇亮子裔盛受僞官妻王氏曰汝可作賊官吾不能作賊妻也亦縊死時蜀婦女先後殉節者則袁氏新津諸生藍燦妻也燦死

於賊氏聞而自縊陶氏漢州江某妻被執不辱偕其子婦張氏罵賊死又有張氏婦者聞賊逼自刎其衣投井死數日出其屍顏色如生絲竹顧生妻留氏抱幼女投井死文姓妻刁氏有美色賊逼之大罵支解死楊生妻蕭氏王姓妻袁氏俱拒賊死成都諸生王某妻熊氏罵賊死彭縣劉姓妻黃氏死於雷打廟趙姓妻官氏先縊其數女而後自縊死什邡顧姓妻賈氏焚其室偕子婦某氏縊死火中萬縣庠生古元直妻譚氏罵賊觸階死潼川進士李某妻吳氏舉人黃某妻張氏歐某妻黃氏貢生楊某妻朱氏皆罵賊死樂至楊某妾荆娘亦不屈死賊獲蓬溪譚某妻陳氏欲污之大罵不從死又有通江王某妻閭氏被執觸樹未死罵賊賊殺之羣鳥環屍哀

鳴不散劍州生員李某妻罵賊剛腹死貢生張某女罵賊刃
穿胸死梓潼生員蒲某妻趙氏投江死魏某妻趙氏投繯死
昭化生員賈某母李氏任某母吳氏並罵賊死又巴州廩生
楊某妻李氏投江死西充婦女死者杜氏婦避賊張邨溝罵
賊斷臂死舉人陳某女貢生張某女罵賊死岳池劉氏婦拒
賊死

犍爲陳天祐者夫妻同遇害賊昇其二女輿中二女抗聲曰
我陳氏女往與父母同死一處斷不玷我鄉里抵營門見父
母屍躍身撞石指賊大罵賊並殺之又仁壽辜氏女者及笄
未嫁爲賊所獲自刎死

敘州婦女殉難者自尹仲妻邵氏妾夏氏子婦楊氏從死外

又總督樊一蘅妻李氏罵賊裂屍死妾夏氏懸髮於梁支解
死前兵部侍郎劉之綸妻楊氏剛兩乳死余智之妻楊氏罵
賊死屬邑則筠連蘇某妻毋氏墜崖死高縣陳某女三姑投
水死隆昌諸生劉茲妻盧氏聞茲被殺給賊曰必見夫屍乃
唯命至茲死所抱屍哭罵被殺又納溪二王氏婦一爲生員
閔某妻被劫投繯死一爲生員易某妻不受污投崖死洪雅
庠生祝錢之子婦楊氏二陳氏宿氏王氏及少女祝氏避亂
山中爲賊所劫六氏拜別父母俱投水死綦江翁某妻康氏
爲賊所獲不屈死又羅氏女年十四投水死

劉氏六合庠生夏清妻也甲申之變四鎮潰兵掠六合氏隨
姑避蘆葦中騎迫投河死越數日得屍龍津橋側顏如生同

時死者有余馨妻馬氏年二十爲潰騎所逼氏且行且罵騎連射七矢罵不止死詹明宇妻左氏爲潰兵所執以刃加頸罵不從偕明宇投河死張起祥妻章氏避難舟中兵欲汚之氏給曰取我衣物來未晚也乘間挈幼女投水死曾孫舉人廷松爲請旌焉又有武氏者熊敬吾妻也隨夫避兵中途相失抱女逃赤山河坂下兵欲汚之逼以刃罵不絕死而林鐘聲妻梁氏遇兵不及避赴水死年十九以上皆六合人馬氏六合馬葵陽之女也年十九避寇金牛山古廟中懼受辱密縫所著衣賊搜得之女以石擊賊破而流血大呼曰頸可斷身不可辱也賊斷其喉死士民立廟祀之

侯氏六合庠生馬純仁妻純仁之殉難也以氏年少託老親

於友人氏聞之矢不嫁以代子職篝燈紡績甘旨無缺年逾九十卒時人謂夫義妻貞萃一門云又貴州巡按御史潘世奇之妾劉氏亦六合人世奇卒於任所年甫二十一撫嫡子如己出守節六十三年又有王氏孫國御妻嘗刲股愈舅疾李氏唐允明妻刲股愈姑疾袁氏朱光政妻嘗三刲股愈夫疾不愈自經以殉皆六合人

張氏宿松諸生吳之瑞妻宏光時城陷軍士欲污之張氏恐禍及夫與子給軍士曰此塾師攜子在此吾醜之遣去則唯命夫與二子已去遠乃厲聲唾罵撞柱死

劉氏懷甯諸生韓鼎允妻宏光時城潰舅姑雙柩殯於堂賊欲破棺劉氏抱棺號哭賊釋之一女年十三賊欲縱火而數

盼其女劉氏給之曰苟不驚屍柩女非所惜也賊喜投炬攜女去劉送女目門外池示之女卽投池死賊怒刃劉罵不絕口死

江都程氏六烈程煜節者江都諸生也其祖姑有適林者其姑有適李者其叔母曰劉氏鄒氏胡氏者而煜節之未字妹曰程娥城被圍與劉約俱死城破娥拜別母縊死劉女甫一歲乳畢以糕餌置女側乃死鄒與胡亦同死適林者投井死適李者遭掠給卒至井旁大罵投井死時稱一門六烈

江都一門殉難婦女程氏外孫氏最著孫道升之前妻生女曰四繼妻蘭氏所生曰七皆嫁古氏次曰存孫女曰巽皆未嫁弟道乾妻王氏子天麟婦丁氏道新妻古氏從弟子啓先

妻董氏諸婦女各手一刀一繩自隨城破巽先縊死蘭時年五十四繼之王氏丁氏投舍後窪中死古氏亦五十四守節三十年頭盡白投井死有外孫女曰睿方八歲從死於井董氏以帶繫門樞縊死存病足削匍投井死董氏之從祖母陳氏方寄居亦自縊死四興七同縊死於牀同時有史著馨者妻張氏年二十六而寡城陷撫其子曰嚮也撫孤今不能顧矣赴水死張廷鉉妻薛氏自縊死廷鉉之妹曰五遇卒鞭撻使從己大呼曰殺卽殺何鞭爲遂見殺

田氏議眞李鐵匠妻也有色高傑步卒掠江上將犯之不從挾之馬上至城南小橋馬不能渡給卒牽衣涉水行中流出不意曳二卒並赴急湍死

劉氏和州諸生張秉純妻也秉純痛國亡絕粒死氏勺水不入口閱十有六日命子扶柩祭拜痛哭而絕

陶氏當塗孫士毅妻守節十年南都亡爲卒所掠縛其手介刃於兩指之間曰從否陶曰速殺爲惠卒未忍殺稍創其指出血問之答如前卒怒裂其手剗其胸死陶母奔護亦被殺于氏丹陽荆溱妻溱父本澈爲亂兵所殺于知不免謂溱曰請先殺妾溱不忍怒曰君欲留爲亂兵污邪溱哭而從之某氏嘉定黃道宏妻也城破攜二女倉卒欲赴井長女曰使母先投必戀念吾二女不如先之挽妹亟入氏繼之并死

王氏和州諸生張侶顏妻南都不守劉良佐部卒肆掠氏同母匿朝陽洞卒攻洞急氏以子付母曰賊勢洶洶我少婦卽

苟免何顏回夫家此張氏一綫善撫之挺身躍洞外觸亂石死

方氏桐城錢秉鐙妻避寇南都歲祲以女紅易米食其夫己與婢僕雜食糠粃客至則取簪珥潔茗治饌秉鐙固名士多交遊莫知秉鐙貧也宏光時阮大鍼興黨錮之獄秉鐙名在捕中走吳中氏挈子追尋得之吳中亦亂乃密紉上下服抱女投水死秉鐙另有傳

王氏崑山人太僕卿宇卿之孫女許聘侍郎顧章志之孫同吉爲妻同吉未婚卒氏年十六歸顧氏守節撫夫兄同應子炎武爲嗣居別室中晝紡織夜讀史記通鑑及本朝政紀書炎武年六歲授之大學少長輒舉劉文成方忠烈于忠肅諸

人事以教之崇禎甲戌巡按御史祁彪佳表其門曰貞孝丙子朝命旌表甲申南都立炎武以薦官兵部司務未赴而南都亡崑山去郡祇三十里警報沓至乃避至常熟之郊謂炎武曰我雖婦人哉然已受朝廷恩命果有大故則死之時炎武方應邑令楊永言之辟與嘉定諸生吳其沆及歸莊等共起兵奉故鄖撫王永祚事敗炎武脫歸將奉母他徙而氏必不可絕粒十七日而卒遺言後人勿事二姓以故炎武累奉我

朝徵召輒力辭不赴以遊學終其身

香娘本金閩名妓豔而工詩爲故忠義伯吳易姬易自大湖兵敗全家盡節惟香娘爲官軍所獲求死不得主者欲收之

充下陳香娘泣曰我相公每飯不忘故君妾亦何忍負之必欲見辱有死而已主者肅然起聽其所之於是入一草巷削髮老焉

草衣道人者金陵人故光祿卿許譽卿姬病革時以薙刀械衣之屬貽譽卿曰當此喪亂之中得全身爲上幸毋自辱南都亡譽卿遂祝髮爲僧

隱隱一名素瑤姓沈氏本維揚倡家女有姿色能詩落籍歸歛諸生夏子龍子龍倜儻有志行不爲章句腐陋之士得隱隱後唱和極樂甲申之變子龍怏怏不自得與隱隱窮日夜酣飲不復休或規之歎曰此信陵君所謂飲醕酒近婦人者也子未揣其意邪南都垂破子龍已得奇疾不可療遂死隱

隱憑屍哭曰天乎亦知郎之所以死乎乃盛飾載拜就棺旁結纓以死

葛嫩秦淮名妓歸桐城孫臨臨負文武才隆武時以貢生授職方主事監巡撫楊文驄軍兵敗被執並縛嫩主將欲犯之大罵嚼舌碎含血噴其面將手刃之臨大笑曰孫三今日登仙矣並被殺

劉淑英廬陵人父劉鐸天啓時知揚州府事忤奄死風節最著謚忠烈方罹禍時淑英止七歲母蕭氏陳其父書自課之旁及司馬兵法公孫劍術至普門經咒莫不精貫及拜歸同邑王鵬年十八而寡甲申闖賊陷京師帝后殉難淑英聞之慟哭曰先子與王氏皆世祿吾恨不爲男子然獨不能殲此

渠兇以報國讎邪因散家財募士卒得千餘人併其僮僕婢
媵部勒之成一旅時督輔何騰蛟置十三家軍散駐楚中張
先壁劄永新聞名請謁淑英方以孤軍無策應者欲資爲助
遂開壁門見之流涕爲指陳大義諸軍胥變色拱立聽命旦
日過先壁報禮且周視其營閱其兵出千金爲犒佐以牛酒
一軍盡驩然先壁實不敢赴敵且微露欲納淑英意淑英乃
大怒就筵間拔劍將斬之先壁惶遽環柱走一軍皆甲淑英
叱曰汝曹何怯也怯如是而能赴湯蹈火乎此吾自不明吾
自誤吾一女子耳又安事甲大書壁上云銷磨鋌膽甘吞劍
抉卻雙瞳欲挂門從容北向載拜曰臣妾將從先國母周皇
后在天左右矣先壁悔且懼率麾下叩頭請死淑英曰婦言

不出於閫吾以國難蒙恥以至於此事之不濟天也將軍好爲之跨馬竟去盡散所部歸田里獨闢一小菴曰蓮舫迎其母歸養奉佛以終

畢潁文名著歙人生崇禎末稟異姿幼工文翰兼能挽一石弓善擊劍其父某守薊邱櫻城拒賊力竭戰死屍陷賊中其部從議請兵復讎曰城在援且絕况城沒邪卽有應亦曠日賊有備事無濟矣乘夜率眾出襲賊方幸城中主將亡夜決無變方嫖妓鬪飲而一軍突入賊駭如天下驚愕失措潁文手刃其渠握首級號於眾曰敢抗王師者有如此首賊乃潰輒焚其營追殺無算賊竟平昇父屍還時年甫二十也捷聞將援蕭山沈烈女事授官俾討賊潁文以父喪辭歸營葬金

陵及南中敗事遂寢當其隨父任時願委禽者沓至張文俱不可若求才之得兼智勇者方許至是歸於崑山士人在聖開相誓偕隱遂入吳門結廬僻境種梅百本以自給吳中傳其殺賊詩云吾父矢報國戰死於薊邱父馬爲賊乘父屍爲賊收父讎不能報有愧秦女休乘賊不及防夜進千貔貅殺賊血漉漉手握讎人頭賊潰自踐踏屍橫滿坑溝父體舉櫬歸薄葬荒山陬相期智勇士慨然賦同仇蛾賊一掃除國家鞏金甌

賈氏沅陵人適同邑諸生潘燿卿隨父省親於南都至湖口夫病卒氏欲赴水女奴持之旣見舅姑痛哭堂下入室自縊不得乃絕食自刎死

沈氏吳縣人許嫁黃于庚未嫁于庚亡父母議改適氏聞之
閉戶自縊以救甦自是編素棲止一樓家人罕見其面鼎革
時兄欲攜之避兵氏曰樓居三十年死固吾分奚避爲絕粒
死又常熟諸生蕭某妻以不受污支解死

劉氏魏縣人署上海縣劉永錫女永錫抗節女恐已詒父母
憂絕粒死齊丈人之葬永錫也女耐焉

徐氏定遠侯鄧文昌妻守備南京魏國公宏基女也文昌航
海赴閩隆武帝命襲爵晉中府氏封恭人年纔十有七文昌
佐大學士曾櫻留守福京

大兵入景甯關氏謂文昌曰君毋自辱妾請先於地下伺之
再拜仰藥死閩人哀之合葬於芙蓉山下

謝氏甯化人諸之邱義之妻也隆武二年八月仙霞關不守田仰潰卒將趨東粵閒道走甯化居民駭竄一卒曰氏豔欲擁之上馬氏據地痛罵卒刃刺之不殊氏懼奪自縊死里人李世熊等咏其事聞於我甯化知縣鄒某將旌諸明義卻之而寢語見義傳

商夫人名景蘭字媚生山陰人故吏部尙書商周祚女越中閨秀稱伯商仲商兩夫人景蘭卽伯商夫人也歸同邑祁彪佳彪佳美丰采時有金童玉女之目祁氏曰先世多藏書梅塋寓園池館之勝甲於越夫人從事簡冊教其三女及子婦張氏朱氏操翰吟詠著有東書堂合稿彪佳殉國雖夫人悼亡云公自垂千古吾猶戀一生君臣原大節兒女亦人情折

檻生前事遺碑死後名存亡雖異路貞白本相成子理孫班
孫以國事被禍張氏朱氏苦節數十年未嘗一出屏門問里
人謂出姑氏之教云張氏理孫婦名德慧字楚纓朱氏班孫
婦名德菩字趙壁

仲尚夫人景蘭之妹也有國色詩與姊齊名適侍郎徐人龍
之子咸清咸清幼有神童之目甫蓄髮卽應鄉舉試旣娶曰
吾以是爲王霸妻足矣鼎革後以當事薦赴召有沮之者乃
歸夫妻偕隱合著小學一書自一畫至多畫正形聲明訓義
名之曰資治文字夫人又嘗寫妙蓮華經三部孝禪寺僧乞
二部去供其一於大殿極裏間納其一於毘盧遮那世尊腹
中別一部則送之天台萬年龍藏中

祁德淵字發英祁彪佳之女也與妹德璠修嫺德蕙湘君首
從母商夫人學詩著有靜好集適餘姚姜廷梧廷梧爲戶部
尙書一洪子罹禍下獄得釋尋病卒德淵痛之自課諸子編
素十六年時我

國家大定諸子願出就試許之伯子兆熊登賢書家人跪請
更吉服曰此區區者遂足易我心乎諸子無計乞之蕭山毛
奇齡援古義說之始易服奇齡爲作祁夫人易服記

沈雲英蕭山人父至緒崇禎辛未武進士守備道州登朱獻
賊破湖南郡縣皆糜爛惟道州以至緒力戰得全旣而賊再
至再戰馬驚仆隕於陣雲英聞變奪臂捷于號哭趨賊營奪
父屍還賊環擲之雲英左右支梧氏莫能傷竟完守入保因

是道州終不破巡撫王聚奎具疏以聞詔贈至緒昭武將軍
賜祠祭授雲英爲遊擊將軍代父職領兵守城雲英初隨父
任適西川賈萬策官荊州督師中軍荊州因萬策分門拒守
城陷不屈死雲英聞訃慟哭辭職間關數千里出入賊中扶
其父與夫兩觀歸蕭山國變後獨棄服飾隱居里門爲女教
授素工書法旁涉經史然非本宗子弟不教也族子兆陽者
從之受春秋胡氏傳爲知名士里人毛奇齡嘗因兆陽請謁
不許卒年三十又八奇齡題其墓曰故明特授遊擊將軍兼
道州守備烈女沈氏雲英云

項淑美淳安方希文妻希文好蓄書乙酉杭州不守方國安
潰兵掠江許希文率妻子載書避山間一夕偶以事出淑美

與一嫗一婢共處亂兵突至縱火婢挽淑美出避光之口出則死於兵不出死於火等死耳死火不辱嫗復呼曰火至矣不之應取書堆左右高與身等與俱燼賊退希文歸則餘燼旋而成堆若護其骨者希文一慟卽散乃收骨葬之先是慈谿有王氏歸同里方姓甫逾月火起延其屋夫他出堅坐小樓不下骸骨俱燼惟心獨存夫歸捧之長慟未頃卽化烈婦錢氏陳氏仁和諸生陳世正妻與姊也陳氏適同邑傅天耳乙酉江防軍潰姑嫂避入富春山中

大兵搜山被獲錢氏守三歲兒知不免躍赴江中與兒俱死遊騎亟擁陳氏上馬墜馬者再髮亂委地膚色如玉騎不忍殺輒以好語慰之曰行將送汝歸扶上馬者凡六慟哭大罵

騎怒甚揮刀斷陳氏軀爲三截去路人哀之埋道傍古槐下
二孟氏河南巡按御史陳潛夫妻或曰妻與妾也姊妹同適
潛夫同日花燭以娶浙東所傳大小孟也南都被潛夫從魯
監國加太僕寺少卿監浙西軍募三百餘人與孫熊二家兵
合列江上丙戌五月晦軍潰歸山陰小菴里置酒賦詩與親
反訣謂二妻曰行矣我爲忠臣汝爲烈婦泉下差不惡也整
衣冠上化龍橋北面再拜推二妻入水具棺殮自濯入水死
今孟氏屋壁猶存潛夫手書絕命詩曰萬里關河戎馬奔三
朝宮闕夕陽昏清風血染長去碧明月聲哀杜宇魂白水無
邊留姓氏黃泉耐可度寒暄一忠雙烈傳千古獨有乾坤正
氣存

潘氏乙酉殉節諸生高點妻朗父岱兵部主事將盡節時朗先蹈海死氏年十九就縊姑何氏誠曰高氏兩世忠孝幸汝已娠或不絕爾夫後踰時產一男七歲氏病姑進藥泣曰向以姑命爲此呱呱者未卽死今將從亡人地下矣卒不飲食以死

俞沈氏會稽殉義士俞禹機妻也丙戌江防潰與女同殉於龍華潭氏年三十六女年十七氏初挈女登舟別以一舟屬子貽穀奉姑他奔旣而呼舟止謂女曰計終不免吾訣矣始所以分舟者恐傷阿婆心且不欲令穉子見也會騎至將逼之氏罵不已自投於潭女亦從之入騎乃大呼烈婦烈女去時六月六日閱八日殮顏色如生

余氏山陰諸生何光衛妻丙戌六月江防潰官軍檄邨落氏
家峽山環居千餘戶悉走避光衛曰事亟矣汝有娠且挈三
歲女滋爲累奈何曰吾思之熟君去毋我慮是夕遍紉衣襦
抱女走匿吳家塢港口苗田中比旦有隔河呼者曰苗田中
誰何婦聲未絕而控弦者逐田畔氏懼亟抱女起投港水以
死控弦者大呼隔河人趨救隔河匿者竄者各駭散有幸免
者見其狀如是時年二十三光衛從兄光育女適本邨唐氏
子同日抱子赴水死年二十有八稱雙烈

倪氏者山陰諸生茹芳妻芳素與營弁譚某隙譚擁兵擒芳
芳遁遂擒氏及一子一女屬龐公池側之空屋期以暮至氏
密縫襦袴破牕投池水死

李陳氏居山陰之畫橋夫某力農而貧氏紡績佐之亂作居民倉皇奔避氏既無力獨行求埒娣姒舟不計遂率女沿河濱行至青田湖畔聞擾攘聲四起泣曰及今不死後將有求死不得者密縫女衣裾拾巨土納兩袖而挈之赴水越數日其夫得屍於沈處色不變同時有丁瑞南婦周氏者三躍三救之而卒以自沈死

張氏東平州人父昌官千戶母王氏同遭白蓮賊亂不屈死時蕭山來斯行任登萊兵備因驚爲妾從之歸及斯行死斷髮秉節宗族賢之丙戌遇兵湘湖欲污之氏預縫衣帶堅不可解大罵被刃死來氏本蕭之望姓同時婦女盡節者最盛投長興鄉水死者儒士冠倫母俞氏妻任氏諸生冠朝妻何

氏儒士逢盛妻黃氏又國子生沈驥妻來氏諸生來裕女及婢小春其投白馬湖死者諸生夢麟妾程氏自縊張家邨楊梅樹下死者貢生逢時母工氏而進士某之妻楊氏者爲諸生楊雪門女兄聞雪門殉義慟哭沈水死尤慄慄也

余氏會稽人總兵章憲妻魯監國航海後憲自江上率潰兵還里今各散去氏曰散易復難王在海上萬一詔至其何以應憲不聽戊子山海氛起憲匿東山中逆奴潛引

王師執憲夫婦去我郡守劉桓鎮將吳學禮許以官令招撫山寇憲不應氏大聲曰男子死卽死耳毋二心也妾願從若死獄成以氏年少美姿容欲留昇幕將氏不許命同戮則欣然就縛至鎮東閣下先磔憲氏瞑目誦佛號及氏連呼劓劓

行刑者馬某故以刀刺氏陰雙股夾不可開乃支解之明日馬恍惚見氏至曰死故我分何見辱邪我得取爾命矣遂椎胸嘔血以死

甬上四烈婦張氏楊文瓚妻文瓚與兄文琦友人華夏屠獸宸坐戊子翻城之獄死張縫夫首棺殮畢卽盛服題絕命詩吞腦子不死以佩帶自縊文琦妻沈氏亦自縊夏之繼妻陸氏絕粒不死姑勸之食已有諸家妻孥北徙之令乃結帨就縊身肥帨絕墮地汗泔泔下坐而搖扇曰余且一涼鄰人聚觀皆進楊梅一盃啖訖徐起易縊而絕有司聞楊華三婦之死遣丐婦四人至獻宸家守其妻朱氏氏陽爲歡笑以接之且謂三婦之自苦也守者信之因謂之曰我將浴汝儕可暫

昇聽之則闔戶自盡時稱甬上四烈婦文瓚等另有傳

烈女王氏侍郎王翊之次也翊死時女年十三許嫁左副都御史戴宗彥子百家以例沒入勳貴家爲杭州將軍部下參領某所養參領憐其爲忠臣女撫之如所生逾時欲爲擇壻有劉弁者求之女不可參領難之女突拔所佩劍自刎死參領大驚葬之臨平山中卽以劍殉

金四姐義興伯鄭遵謙妾初爲娼以殺婢下獄遵謙以千金出之遂委身事焉江上軍潰遵謙挾貲及氏入於海戊子正月鄭彩殺大學士熊汝霖遵謙不平衫以計殺之海中氏號慟欲死家人救之乃溥草人書衫姓名每祭寸斬以侑食彩聞之亦投氏於海己亥秋彩坐廳事見熊鄭擁兵入驚撲投

階下七孔流血死金氏於海上屢顯靈異海人稱之爲金娘

方氏周氏畢氏姜氏皆大學士張肯堂妾沈氏肯堂家婦茂
濟女孫也舟山將陷肯堂集家人曰毋爲人辱及

大兵入肯堂冠帶至雪交亭南向坐六人珠翠盛飾相率拜
辭或投繯或投池死畢氏臨水將先下姜氏呼之曰止雖死
亦有序莫怱怱也肯堂曰善乃各以序死僕婦婢女之從死
者又十數人

李氏京衛人父榮爲衛將軍世衛李氏氏少夢神授之筆
願知鈴略旣長適餘姚毛有以官定海守備爲保定伯有倫
弟乙酉之變移定海軍從武甯侯王之仁到西陵渡時馬士

英竄身方國安營稱方馬軍氏謂有俶曰士英逆賊也棄君
來此此地難與守矣武甯軍西陵君何不移駐龕山以遠方
馬乎旣而太湖兵起吳易陳萬良輩各以偵謀從龕山渡欲
引龕山軍從海甯入氏復勸有俶行未及而江上諸軍潰有
倫區監國宮眷中道相失遂全軍歸命有俶乃偕氏逸之海
甯旣又遷淮遷彭城隱姓名入編戶以終有俶初以從監國
功爵靖南將軍氏封夫人

文鸞者侍郎李長祥室黃氏之侍，父已給其僕某爲妻戊子
翻城事發長祥兵潰黃氏集家人謀共死文鸞泣而前曰天
人當爲公子計以延李氏香火惡可死婢子願代夫人以吾
女代公子俟死於此願夫人速以公子去黃泣曰我安忍曰

小不忍最害事速驅之山中有羅吉市者嘗遊長祥門下曰
夫人公子我則任之雖以是死甘心焉於是黃氏抱其子晦
拜吉甫且拜文鶯文鶯曰夫人休矣捕者行至矣甫出門而
捕者果至以文鶯去有徐昭知者亦義士不知夫人之既脫
約死士謀要之已乃微聞其非真遂止吉甫匿黃氏母子知
平西伯王朝先於長祥爲嫫嫫海以往則長祥已先在相見
慟哭爲言文鶯事長祥曰文鶯一木訥女子今若此實難能
可感也文鶯初被逮居然以命婦自重見大府不肯少屈莫
不以爲眞夫人例應徙遐左按察使劉自宏淮人也一日
玉鼓傳令啓城命吏以文鶯就道不得少待或曰劉蓋憐長
祥之忠亦壯文鶯之奇密取之歸養於家而以囚中他婦代

之去

鮑氏閩人職方主事錢肅遼妻甲申前納采未娶而難作閩浙路絕父兄欲更擇婿氏不可父兄歎曰非不知其不可顧錢卽播遷天未定還無望氏纏臂出血以誓其家愕然乃止己丑肅遼從亡舟山辛卯舟山破始歸成婚氏年二十又六矣以懼禍夫妻避之崑山越五年肅遼感懷家國嘔血死氏勉力治殮祝髮爲尼與三洲殉難忠臣劉曙妻某氏同居一草菴紡績以求歸貲數年始得呼其弟至崑負骨以歸或勸以火化輒哭拒之卒歸葬之祖塋旁

吏八夫人姓李氏宛平人言輔史可法弟可經妻卽可法妻之女弟也可法殉難可經亦旋歿李氏與可法母妻居金陵

焉先是揚州開府時有幕下客浙中厲韶伯者軀貌類可法
冒其名集亡命數百人由舒廬破巢縣無爲擒訊之則堅冒
可法名眾莫能辨乃召可法母妻暨李氏識認始吐實而李
氏有國色爲眾所窺戊子金聲桓反禁旅往討駐金陵有遼
官聶三者思媚少宰某強委禽焉遣婢拒之不聽詈之亦不
聽須臾一婢奉黑漆盤進曰奉八夫人命意盡於此恣若所
爲聶啓視之則血淋漓一髮髻一耳一鼻也聶大驚躍馬馳
去

李氏番禺宏福鄉人許氏潭山鄉人癸巳李定國帥師至新
會鄉民治樓船應之已而定國兵敗

王師進討鄉民李氏六處女皆登樓縊死許氏二處女從母

某氏庶母某氏投井死屈大均以詩記之

夏氏黔國公沐天波侍女也沙定洲之亂天波出走母陳氏妻焦氏舉火自焚死夏獲免天波自永昌還則已薨爲尼矣天波感其義俾佐內政及天波從亡緬甸夏自經時城中死屍載道爲烏犬所食夏屍獨無犯者

郭純貞益陽人兵部尙書郭都賢女也聰慧能詩父愛之許字黔國公沐天波之子滇黔路梗音耗遂絕女守志不嫁自題所居曰郭貞女廬後爲尼易名聯本結廬浮邱山下曰卓菴年八十餘卒

董夫人延平王朱成功妻也父容先爵里不可詳夫人初不禮於成功辛卯二月

王師襲廈門守將鄭芝莞擁珍寶棄城逃夫人抱神主及諸岸舵工林禮負以登芝莞舟芝莞遽曰此戰艦也非夫人所居再三促之夫人堅坐不動積藏得無恙成功以是深嘉之與謀軍國成功薨子經嗣戒之厚將士恤百姓丁巳之敗經狼狽歸夫人讓之曰馮陳之業衰矣猶有先君黃洪之刃若輩庸可救乎不肖子徒累維桑則如勿往克塋之死也非夫人本意悔恨成疾辛酉六月卒臺人感夫人惠者咸歎息焉唐夫人嗣延平王經之妻侍郎顯悅女孫也而不禮於經己經亂弟之乳母陳氏而生子夫人愬諸顯悅發其奸幾至禍亂

陳夫人鄭克塋妻陳永華之女也馮錫范將弑克塋以太妃

董氏命召之入克臧謂夫人曰恐不能相保矣夫人曰夫亡
與亡不相負也既聞變擗踊入請於太妃曰監國何罪太妃
曰以非鄭氏子耳夫人曰兒亦安知監國之非鄭氏子乎何
十八載不言也卽爾亦可爲兵民何至死太妃語塞時夫人
方娠慰之曰生男女我自好待之毋自苦夫人曰成立之父
尙不能保七尺軀況呱呱邪我夫妻子母願相從於地下耳
兄繩武夢球賢之請於太妃令登臺受文武祭奠從容投繯
死葬臺灣縣之武定里

鄭氏鄭斌之女我續順公沈瑞之隨延平王經入臺灣也經
命斌以女妻之辛酉行人傳爲霖謀內應事洩並逮瑞囚其
眷屬以斌故免氏令歸氏謂父曰沈氏罹重禍兒安可獨生

願同繫乃羈之別室瑞將就縊使人持一帶別氏氏殮瑞兄弟暨祖姑姑畢乃結帶自縊死

黃棄娘泉州黃堂壯女也年十九適行人傅爲霖之次子璇爲霖內應謀洩父子俱置極刑家屬發配棄娘兄銓爲營救棄娘哭曰今日之事子爲父死妻爲夫亡於理甚順復何憾遂自縊死

鄭宜娘漳郡人年十八適臺灣謝燦燦卒宜娘號泣投繯死知天興州建坊表之

四葉氏一陳三淑妻遇寇觸階死一陳少卿妻遇寇投井死一劉畿妻夫殞於盜自經殉隆武丙戌舉人張金棕表其墓曰女中夷齊一庠生葉車書姑也夫某病卒自經殉有司爲

立碑洪水橋皆明季廈門人或以爲

國朝人者志書誤也

義娘者廈門人或曰王氏女或曰侯氏相傳以爲曾厝垵人故或又以爲曾氏也年及笄遭寇頭觸石幾碎投同安之東嶽廟旁井中死後數年爲康熙癸丑鄉人蘇貴感異夢掘井見白骨以素練衣裹之及葬衣化爲水鄉人異之爲立祠井上號曰義娘井水旱災禱禱輒應病人飲井水輒愈路人多以竹筒盛水載之歸

楊氏廈門孫若瓊妻也康熙癸卯

王師克廈門氏以兒付若瓊攜女投井死越數日屍浮出顏如生

陳氏廈門陳正公女辛卯爲兵所掠乘間投井死後家人葬之顏如生

楊氏廈門人兵部主事期演女也適南安鄭某鄭卒於京有議婚者自經死

男承禮編輯

仁和魏錫曾參校
會稽梁繼元覆校

小腆紀傳卷第六十終